

ARTICULUS II.

De ordine, veritate, & perfectione.

I. **O**RDO est certa dispositio, qua res inter se ob similitudinem quandom collocantur: ita in biblioteca libri ordine collocati dicuntur, si unicuique assignatur locus conveniens. Pro varia autem similitudinis ratione varius ordo esse potest; sic libri in eodem loco reponi possunt, qui de eodem argumento agunt, vel qui eadem forma gaudent, aut etiam pro alio quem unusquisque sibi fingit similitudinis modo. Ex hac autem multiplici ordinis ratione, unus ordo compositus aliquando formari potest, ita in exemplo praecedenti 1 libri, qui de eadem materia tractant, in eodem loco sunt reponendi. 2 Libri eadem lingua conscripti in suo quoque eorum genere sunt conjungendi. 3 Libri ejusdem formæ in suo quoque genere conjungi debent. 4 Liber qui prius prodiit, in sua convenienti serie eum debet praecedere, qui tardius lucem aspergit. Alia quælibet dispositio ordinis opposita *confusio* appellatur. Ex dictis patet ordinem quemlibet suam habere rationem, ac proinde omnis ordo suas habet regulas. Si regulæ illæ, salva rerum ordinandarum essentia, aliæ esse nequeant, ordo *absolute necessarius* est; contra autem *contingens* est, si manente rerum essentia, regulæ aliæ esse possint.